


CUMEGN DA SALOUF

LESCHA DA SEPULTURA E SANTIERI



A. Organisaziun, menaschi e survegliaziun

Art. 1

Basa legala e survegliaziun

Tenor art. 12 dalla lescha da sanadad digl cantun Grischun sottastattan igls fatgs da sepultura e santieri agls cumegn. Igls fatgs da sepultura sottastattan allas determinaziuns dall'ordinaziun cantunala digls 27 d'otgover 1998 pertutgont igls fatgs da sepultura. La survegliaziun suprema digls fatgs da sepultura e santieri vign execueida dalla suprastanza communal.

Art. 2

Incumbensa

L'incumbensa cumpeggia:

- a) surveglial ed admuneir tgi vigna observo igl urden da sepultura e santieri;
- b) piglier ancunter l'annunztga da mort e terminar la sepultura an ancligientscha cun la famiglia an malancurada ed igl plevant;
- c) cunsigliar igls survivents an la preparaziun dalla sepultura;
- d) ordinar igl tutgier da mort;
- e) surveglial igl decurs dalla sepultura;
- f) manar ena controlla dallas sepulturas e fossas.

B. Lescha da sepultura

Art. 3

Vaschels da mort ed urnas da tschendra

Admissibels èn sulettamaintg vaschels da mort da lenn lom ed urnas da tschendra. Igls survivents on da procurar sezs per igls vaschels da mort e las urnas da tschendra.

Art. 4

Dretg da sepultura

La sepultura dalla bara è lubeida siva dall'annunztga alla suprastanza, risguardond las prescripziuns correspondentas.

Igl dretg da sepultura sen santieri exista:

- a) per abitants digl cumegn da Salouf;
- b) per persungas tgi èn mortas u per persungas tgi èn neidas cattadas scu bara segl territori da cumegn;
- c) per persungas cun domicil extern, cun lubientscha speziala dalla suprastanza communal.

Transferimaint **Art. 5** Igl transferimaint da persungas mortas tgi vignan sutaradas a Salouf, è tgossa digls survivents ed i valan las prescripziuns cantunalas.

Tutgiez da mort **Art 6** Igl caloster duess tutgier da mort tenor igl urden suandont:
a) an terma da 24 ouras siva l'annunztga da mort vign tutgia treis gedas
¼ d'oura cun ena pôssa mintgamai da 5 minutas:
per omens: antschever e fittar cugl sains grond,
per donnas: antschever e fittar cun l'Ave Mareia (igl sains sagond grond),
per unfants tgi na von betg a scola: tutgier igl sains pitschen;
b) igl de da sepultura vign tutgia ¼ d'oura cun tot igls sains dalla baselgia da Son Giera.

C. Lescha da santieri

Publicitad **Art. 7** Igl access agl santieri è lubia a mintgign. Igl è scumando da far donn e da tartigneir las fossas, da scarpar giu flours e plantas, da disturbar la quietezza da santieri cun en saderputar dad ot e disturbont, scu er da piglier u lascher antrar animals an santieri.

Fossas **Art. 8** I vign disfrantzgea tranter:
a) fossas an retscha per vaschels da mort per carschias
b) fossas an retscha per vaschels da mort per unfants anfignen 10 onns
c) fossas an retscha per urnas da tschendra
d) fossa comunabla (angal per la tschendra)

Urden dallas fossas **Art. 9** Tranter las fossas duess neir tignia ena distanza da 70 cm. La profunditad minimala per carschias monta 1.6 m, per unfants anfignen 10 onns 1.3 m e per urnas 80 cm.

Las maseiras exterioras dalla fossa montan:

- per carschias: 170/95 cm
- per unfants: 130/80 cm
- per fossas doblas: tenor cunvagnientscha cun la suprastanza
- per urnas: 100/75 cm

La distanza tranter las fossas fittadas monta 30 cm.

Art 10

Occupaziun d'ena fossa

Ainten ena fossa dastga neir puso angal ena bara, exclus tar ena sepultura d'ena mamma cun sies unfant novnaschia, u tar egna u plessas urnas. D'exepziuns decida la suprastanza.

Art. 11

Monumaints da fossa e reschlas

La fossa duess corresponder ad en senn per bellezza e betg disturbar igl ambiaint e la quietezza generala digl santieri. I dastgan neir messas ve angal crouschs da fier battia. L'otezza maximala monta 1.4 m. La tavla cugl nom e datum da mortori stò neir farmada ve dalla crousch. Per fixar la crousch dastgan neir duvros angal craps naturals. Furmas tgi disturban u calour èn da tralasher. Las reschlas èn obligatoricas e ston esser messas horizontalas e na dastgan betg esser daple tgi 20 cm largias e per fossas per urnas 15cm largias.

Art. 12

Mantignamaint ed ornamaint dallas fossas

Igl mantignamaint dallas fossas è tgossa digls survivents digl defunct. Las fossas na dastgan betg neir ornadas cun plantas tgi surpassan en'otezza da 60 cm. Reparaturas ve dallas reschlas e crouschs tgi pendan tort u malsieir, on da neir procuradas u allontanadas dalunga digls survivents, an tot cass mintg'onnn anfignen igls 1 da matg. Fossas tgi na vignan betg rugaladas, malgro en'admuniziun, pon neir ornadas an incumbensa dalla suprastanza ed a cost digls survivents. Schi igls survivents n'èn betg ancunaschaints, vign la fossa ornada e mantigneida a cost digl cumeegn.

Art. 13

Fossa comunabla

La fossa comunabla vign mantigneida digl cumeegn.

Art. 14

Responsabladad digl cumegn

Igl cumegn surpeglia nigna responsabladad per donns caschunos ve da fossas e monumaints da fossa antras pussanza surnaturala, decadenza, pressiun da neiv, orcans, schaladas, animals u antras terzas persungas.

Art. 15

Silenzi da mort

Igl silenzi da mort monta aglmanc 20 onns per defuncts scu er per urnas. Urnas sutaradas ainten ena fossa existenta perdan pero igl dretg da rastar 20 onns an fossa, schi la fossa vign revocada tenor turnus.

Cun la revocaziun dalla fossa vignan urnas restitueidas alla famiglia. Sen giaveisch pon talas er neir sutaradas ainten ena fossa d'urna ni ainten la fossa comunabla, a chint digls survivents.

Averturas da fossas èn lubeidas angal per muteivs giudizials u per muteivs dalla pulizeia sanitara e cun lubientscha digl departamaint da sanitad, a cost digl mandant.

Art. 16

Revocaziun dallas fossas

La revocaziun dallas fossas vign ordinada dalla suprastanza communal. Igl survivents èn responsabels per rumager la fossa. N'è chegl betg igl cass, vign la fossa rumageda antras igl cumegn, a cost digls survivents. Schi igls survivents n'èn betg ancunaschaints, succeda la rumageda a cost digl cumegn.

Art. 17

Tgavar la fossa

La suprastanza procura per l'avertura dalla fossa, conform a chesta lescha. Igl costs vignan adossos agls survivents tenor art. 18. En chels betg ancunaschaints, vign la fossa tgavada a cost digl cumegn.

Art. 18

Taxas

Igl cumegn metta a chint per mintga bara tgi vign sutarada ena taxa. Chella taxa cumpeglia igls costs per tgavar la fossa. La fixaziun dallas taxas sotastat alla suprastanza communal.

Per defuncts cun igl davos domicil da dretg civil aint igl cumegn:

- a) Fossa per vaschels da mort per carschias fr. 800.00
- b) Fossa per vaschels da mort per unfants anfignen 10 onns fr. 400.00
- c) Fossa per urnas da tschendra fr. 300.00
- d) Urna da tschendra ainten ena fossa existenta fr. 300.00
- e) Fossa comunabla fr. 200.00

Per defuncts cun domicil ester:

- a) Fossa per vaschels da mort per carschias fr. 2'000.00
- b) Fossa per vaschels da mort per unfants anfignen 10 onns fr. 1'000.00
- c) Fossa per urnas da tschendra fr. 900.00
- d) Urna da tschendra ainten ena fossa existenta fr. 900.00
- e) Fossa comunabla fr. 600.00

D. Determinaziuns finalas

Art. 19

Contravenziuns

Contravenziuns cunter chella lescha da sepultura e santieri vignan puneidas dalla suprastanza communal cun en castei da fr. 50.00 anfignen fr. 200.00.

Art. 20

Antrada an vigour

Cun l'antrada an vigour da chella lescha vignan dissolvadas tottas determinaziuns tgi stattan an cuntradiziun cun tala. Ella ramplazza igl urden da sepultura e santieri digls 19 d'avregl 1994.

Approvo antras la radunanza communal digls 26 d'otgover 2009.

Igl mastral:

L'actuara:

Giatgen Peder Fontana

Sandra Baltermia-Guetg